



Gabinete Wever - Croes II

ISLAONLINE

Noticia di Gobierno

2023

Diamars 11 Juli 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



PROME MINISTER A ATENDE CEREMONIA DI GRADUACION DI EPI SECTOR "HOSPITALITY AND TOURISM"

"Mi ta encurasha cada un di boso, pa bay eyfo y haci tur boso esfuerso pa logra cada un di boso metanan"

Diabierna anochi, Prome Minister Evelyn Wever-Croes a atende e ceremonia di graduacion di EPI, sector "Hospitality and Tourism", cu a tuma luga na Aruba Marriott Resort and Stellaris Casino. Na su yegada, Prome Minister a wordo ricibi pa Director di EPI, señora Ankie Danker. Na inicio di e ceremonia oficial, Prome Minister tabata tin e oportunidad di duna un discurso, na unda el a dirigi su mes na e graduadonan, dunando nan un bunita conseho y deseando nan tur clase di exito den futuro.

E anochi tabata uno hopi special, na unda cada graduado a ricibi cu hopi orguyo nan diploma, cu ta simbolo di nan dedicacion y esfuerso durante añanan. Prome Minister hunto cu señora Tisa LaSorte di Aruba Hotel and Tourism Association (AHATA), a entrega cada graduado nan diploma, y a haci esaki dilanti di

famianan, docentenan y demas graduado presente. Despues di a ricibi nan diploma, nan por a disfruta di un dushi cuminda, acompaña pa musica agradabel.

"Mi ta felicita cada un di boso cu e logro aki, y ta desea boso tur clase di exito cu cualkier decision cu boso tuma, sea di bay sigui studia of di cuminsa traha. Mirando cada un di boso awe nochi ta hiba mi bek na tempo cu ami a studia, un tempo cu hamas mi lo por lubida y cu lo mi carga den mi curason pa semper. P'esey mi ta encurasha cada un di boso, pa bay eyfo y haci tur boso esfuerso pa logra cada un di boso metanan. Purba na descubri bo potencialnan den e proceso di crea e miho version di bo mes. Mi ta desea cada un di boso tur cos bon pa cu e siguiente pasonan y cu tur boso soñonan wordo cumpli," Prome Minister a expresa.





POTRETNAN DI CEREMONIA DI GRADUACION DI EPI SECTOR





RESUMEN DI SIMAN

Asuntonan General,
Innovacion,
Organisacion Gubernamental,
Infraestructura y
Planificacion Teritorial

PROME MINISTER, EVELYN WEVER-CROES

1 - 7 di 2023



• 160 AÑA DI ABOLICION DI SCLAVITUD DEN REINO HULANDES:

Dia 1 di Juli, Prome Minister a atende un encuentro pa conmemora e di 160 aña di abolicion di sclavitud den Reino Hulandes. Den su discurso, el a reconfirma e compromiso di Gobierno pa e crimen aki nunca mas wordo ripiti y pa nos por biba riba un pais, sin rasismo y discriminacion.



• SECRETARIO DI ESTADO VAN HUFFELEN

Prome Minister Evelyn Wever-Croes hunto cu demas minister y conseheronan a reuni cu Secretario di Estado Alexandra van Huffelen riba e topico di refinanciamiento di e 916 milyon florin cu Hulanda a financia Aruba den temporada di Covid y pa duna un "update" riba e landspakket. Prome Minister a indica cu e reunion tabata uno positivo y cu lo sigui na mesa pa asina yega na solucionnan pa bienestar di e comunidad di Aruba.



• REUNION DEN PARLAMENTO

Diaranson a tuma luga den Parlamento di Aruba, un reunion pa asina trata e ley di BBO na frontera. Durante e reunion, Prome Minister a contesta tur e preguntanan dirigi na su persona.



• MARIA GORETTI COLLEGE

Maria Goretti College a logra cambia nan sistema di coriente, pa asina por instala airco den e klasnan. Prome Minister hunto cu Minister Endy Croes a bishita e scol pa asina hacie e honor di sende e airconan. Sigur un momento hopi special pa e maestro y alumnonan. Prome Minister ta gradici tur esnan cu a haci esaki posibel.



• FORBES MAGAZINE

Prome Minister a reuni cu periodista Natalia Gomez-Navarette di FORBES Magazine Latino America basa na Mexico. FORBES magazine a bishita Aruba pa promove e destinacion y pa scirbi riba e topico di hende muhe guiando nos pais y empoderando hende muhenan.



• FINAL PERIODISTA PA UN DIA

E di dos edicion di Periodista Pa Un Dia a culmina diabierna ultimo cu un bishita na TeleAruba. Akinan e muchanan a haya un recorrido di tur e trabounan cu e TeleAruba ta haci. Prome Minister ta gradici TeleAruba pa a "partner up" cu gobierno de e proyecto aki dunando e proyecto un dimension hopi mas profesional. Prome Minister ta spera cu e proyecto aki inspira nos muchanan pa mayan nos por conta cu periodistanan prepara pa haci e trabou di periodismo.



CONTRARIO NA LOKE MIKE EMAN TA TRECE DILANTI, HUSTAMENTE ARUBA TA DEN DEMANDA GRANDI COMO DESTINACION

Recientemente por a tuma nota di un articulo cu sr. Eman a skirbi. E lider di fraccion di AVP un biaha mas ta pinta un situacion di nos turismo cu no ta cuadra cu e realidad. Pa e motibo aki Minister di Turismo y Salud Publico sr. Dangui Oduber tin e deber pa aclarea locual sr. Eman a declara.

E realidad ta cu Aruba su turismo ta na caminda pa un año record. Tur indicador ta muestra esaki, e cifranan no ta gaña. Di januari te cu juni tur luna Aruba tabata tin un recuperacion di mas di 100% den comparacion cu año 2019 cu tabata un año record.


Minister Oduber su maneho ta dunando su fruto. Un maneho cu ta basa na busca e turistanan afuente, e turista di calidad cu ta gana mas di 150 mil dollar pa año. Ta keda haci inversionnan continuo den e producto Aruba, esaki ta pa nos keda competitivo. Un maneho caminda a diversifica Aruba su turismo den diferente mercado, mercadeando Aruba tur caminda y habriendo rutan nobo.

E realidad ta cu Aruba su turismo ta creciendo, e cifranan ta demostra esaki. Ta berdad cu nos mercado di Europa a cay cu 9.8% (esaki ta representa 3222 turista) den comparacion cu mei 2022. Mester tene na cuenta cu e mercado di Europa ta solamente +-8% di henter e

mercado turistico di Aruba. Di otro banda nos tin e mercado di Canada cu a crece 108.1% (un crecimiento di 15846 turista).

Minister Oduber ta lamenta cu sr. Eman kier purba na manipula pueblo, pintando un situacion cu no ta cuadra cu realidad. E ta haci dolor pa admiti cu Aruba su turismo ta bayendo mas miho cu nunca. E mandatario a splica cu Aruba su turismo ta bayendo bon por lo general.

Pueblo por ta sigur cu Aruba su turismo ta riba e bon caminda. E demandanan pa Aruba como destinacion ta halto. Danki na e maneho di diversificacion awe tin mas cu un gateway pa yega Aruba for di Europa of cualquier caminda rond mundo. Turismo ta keda e driver di nos economia.





TREMENDO ACOGIDA PA CURSO FINANSAS DEN MI HOGAR DEN BARIO DI SAVANETA

Un total di 50 ciudadano a ricibi nan certificado di participacion na e curso Finansas den mi Hogar den distrito di Savaneta. Esaki ta bira e di cuatro grupo di ciudadanonan den diferente distrito cu a participa na e curso Finansas den mi Hogar. Finansas den mi Hogar ta un proyecto cu ta wordo organisa y financia door di Minister Geoffrey Wever y desaroya door di Fundacion Plan di Bida.

Savaneta ta bira e di cuatro distrito cu a participa na e curso gratis riba educacion financiero. Durante cuatro sesion a trata temanan manera con pa ta efectivoden bo hogar, pago di debe, inverti den futuro y presupuesto. Riba cada tema participantenan a ricibi mas informacion y tips riba maneho di entrada y gasto. Ta importante pa ta consciente riba nos entrada y gasto y con esaki ta afecta nos estabilidad y metanan financiero. E curso ta enfoca pa bira critico riba nos decisionnan financiero y tambe riba nos actitud cu por afecta sin cu nos sa, e cartera.

E curso ta forma parti di maneho economico di minister Geoffrey Wever pa stimula cu consumidornan di Aruba bira mas consciente y critico. Un consumidor consciente y critico ta e fundeshi di un economia inclusivo y duradero. Facilita e curso gratis aki lo duna e ciudadano, e consumidor e habilidad riba e maneho financiero di su entrada y gastonan. Un habilidad cu ta necesario pa evita problemanan financiero manera debe y biba mas miho y mas comodo.

Ta importante pa nos ciudadanonan por yega y participa na e curso. P'esey e meta pa ofrece e curso Finansas den mi Hogar gratis, den tur distrito y cerca di nos ciudadanonan segun minister Geoffrey Wever.

Minister Geoffrey Wever ta gradici cada ciudadano cu nan participacion, un participacion cu sigur lo contribui na nan desaroyo y bienestar personal.

E siguiente distrito, na unda e curso Finansas den mi Hogar lo tuma lugar, ta Noord. Registracion ta completamente gratis, pero cupo ta limita. Pa mas informacion por tuma contacto cu Fundacion Plan di Bida na telefon 5688848 of email finansasdenmihogar@gmail.com





MINISTER ENDY CROES TA FELICITA CAMPEON INTERNACIONAL DI KICKBOXING CLAYTON RAVEN



Minister di Enseñansa y Deporte Endy Croes a ricibi bishita di campeón di kickboxing Clayton Raven. Clayton Raven a pone Aruba su nomber den halto internacionalmente den e deporte kickboxing na Alemania. Clayton a participa den e evento grandi na Alemania Enfusion, unda cu a bringa pa e titulo Co-Main Event. E boxdo di 24 aña a bringa den e categoria di 80 kilo bay ariba y den apenas di dos ronda a manda Selimovic di Bosnia den skina cu un TKO. Esaki sigur ta rekeri di deseo, disciplina, dedicacion y determinacion.

Diamars ultimo, Minister Endy Croes a entrega Clayton un Reconocemento di Excelencia y medaya pa Enfusion/ IFP Champion 2023 & Kickboxing Champion 2023. Un momento bunita, unda cu e mandatario di Deporte, Clayton y su representantenan por a comparti. Minister Endy Croes ta felicita Clayton pa su titulo di campeón den e disciplina di kickboxing y ta felicita henter su ekipo cu a contribui den su triunfo. Minister Endy Croes ta desea Clayton tur clase di exito den su proximo pelea internacional na september. Aruba ta orguyoso di bo!



MINISTER ENDY CROES TA FELICITA E 66 GRADUADONAN DI COLEGIO NIGEL MATTHEW

Siman pasa, Minister Endy Croes a atende diferente ceremonia di graduacion. Diadomingo ultimo, mandatario di Enseñansa a presencia “A Starry Night, Blue Moon” Graduacion di Colegio Nigel Matthew den e ballroom di Aruba Marriott Resort. E anochi festivo a inicia cu e himno di Aruba interpreta pa Whitney Peña acompaña pa Jayden Richardson riba guitarra. Sigui pa discurso di “leiding” di Colegio Nigel Matthew Sra. Jasmine Tromp. Minister Endy Croes a duna un discurso y a felicita e graduadonan di aña 2023.

Enseñansa ta e motor di un pais y fundeshi di un nacion. Mandatario di Enseñansa a indica cu Gobierno di Aruba tin e tarea pa inverti den enseñansa y crea plataforma pa brinda oportunidad pa tur ciudadano por educa y desaroya nan mes. “Nos ta contento cu e 66 hobennan a haci bon uzo di e oportunidad aki”, Minister Endy Croes a expresa. Colegio Nigel Matthew ta conta cu un total di 66 graduado e aña aki. Durante e anochi festivo a reconoce e miho graduado di havo Nzingha Duinkerck. Sigur un momento hopi emocional durante e ceremonia tabata ora cu a recorda e alumno Ashendel Andrea den feliz memoria cu lo a finalisa su estudio e aña aki. Ashendel tabata un alumno ehemplar, dedica, motiva y stima na Colegio Nigel Matthew. Ashendel tabata practica deporte y a representa Colegio Nigel Matthew den diferente competencia escolar.

Den number di Gabinete Wever – Croes II, Minister Endy Croes a felicita e graduadonan. Alabes, Minister Endy Croes ta gradici Sr. Ivor Curie y Sra. Jasmine Tromp “leiding” di Colegio Nigel Matthew, staf, mentor, docente- y mayornan cu a contribui den e logro di e graduadonan y desea tur graduado hopi exito den e siguiente etapa di nan estudio.



MINISTER ENDY CROES A PRESENCIA GRADUACION DI COLEGIO ARUBANO HAVO

Durante e ceremonia di graduacion a otorga diploma na 173 graduado



Diabierna anochi, Minister Endy Croes a atende Graduacion di Colegio Arubano Havo na Hyatt Regency Aruba. E atardi ameno a inicia cu e himno di Aruba canta pa e graduado Gianna Tromp. Sigui pa discurso di rector di Colegio Arubano Sr. Tim Croes. Minister Endy Croes a duna un discurso y a felicita e graduadonan di aña 2023. Enseñansa ta e motor di un pais y fundeshi di un nacion. Mandatario di Enseñansa a indica cu Gobierno di Aruba tin e tarea pa inverti den enseñansa y crea plataforma pa brinda oportunidad pa tur ciudadano por educa y desaroya nan mes.



“Nos ta contento cu e 173 hobennan a haci bon uzo di e oportunidad aki”, Minister Endy Croes a expresa. Colegio Arubano Havo ta conta cu un total di 173 graduado e aña aki. Durante e anochi festivo a reconoce e miho graduado di havo Naysa Rojas. Den nomber di

Gabinete Wever – Croes II, Minister Endy Croes a felicita e graduadonan. Alabes, Minister Endy Croes ta gradici rector Sr. Tim Croes, conector di H5 y V6 Sra. Lixanne Gemerts, staf, mentor, docente- y mayornan cu a contribui den e logro di e graduadonan y desea tur graduado hopi exito den e siguiente etapa di nan estudio.

Continuacion POTRETNAN DI GRADUACION DI COLEGIO ARUBANO....



Uni forsa y cu
positivismo
ta produci
beneficianan grandi
den diferente area pa
famianan, politica,
matrimonio, pais, etc
Hunto nos ta uza e
benificianan aki pa
engrandece nos mes
y Aruba.



2023

AÑA DI UNION Y POSITIVISMO!